

Vol. LII, No. 4, July - August, 2023

# Didakhe



Party Politics ruihchilhna - Phek 4-na

A Bi-Monthly Journal of Christian Thought, Life and Work

Editor : Rev. Prof. H. Vanlalruata  
Mobile : 94851 40303

Joint Editors : Rev. Prof. P.R. Hmuaka  
: Rev. Prof. B. Lalnunzira  
: Rev. Dr. R. Vanlaltluanga  
: Rev. Lalduhawma Ralte  
: Rev. P.C. Vanlalhruaia  
: Rev. Dr. Lalrokhuma Hmar  
: Rev. Dr. Lalawmpuia Hahnar  
: Rev. V.L. Krosschuanmawia

Manager : Rev. Dr. H. Lalnunmawia  
Mobile : 8729832155  
(Kum khat lâk man: Rs. 80)

*A chhûnga thu awmte*

	<b>Phêk</b>
1. Editorial .....	1
2. Keimahni .....	2
3. Party Politics ruihchilhna .....	4
4. Paula leh thilsiam dang humhalh .....	18
5. Thuthlung Tharin indona chungchang a zirtir dan .....	24

---

Didakhe-a thu chhuahte hi Aizawl Theological College (ATC) emaw,  
Editorial Board emaw ngaih dân a ni vek lo.

---

Published by the Didakhe Board,  
Aizawl Theological College, Durtlang Leitan, Aizawl  
Post Box - 167, PIN - 796001, Mizoram

**Editorial: HNAM CHAWIMAWI**

*Felnain hnam a chawimawi a,*

*Sualna erawh chu hnam tin tan hmingschhiatna a ni (Thuf.14:34)*

Tupawhin hnam ropui nih kan duh vek awm e. Tun lai khawvel hian mahni hnam hlutna kan hre thar hle a, mahni hnam humhalhna lamah pawh hma kan la mek hlawm a. Chutih mek laiin khawvelah hian hnam boral mek hi eng emaw zat an awm bawk a. Jim Nelson Black-a chuan hnam ral tur zia hetiang hian a sawi a: *“Dan mumal lohna, hna hmuh lohna, induhsak bikna, zirna tlahniam, culture tlachhia, tradition hloh, sum leh paia intlansiakna, mipat hmeichhiatna hluar, sakhaw ngaihnepnna, nunna hlut lohna”*tiin. Kan awm dan leh thil tih mek hian hnam boral mek kawng a zawh em tih te kan chhut ngun fo a ùl òin.

Pathian chuan Abrahama chu hnam tam takte pa ni turin a ko va, Mosia chuan Israel fate chu hmelma kut ata a hruai chhuak. Hnam tharte tan Thusawm Pek a pe a. Thuthlung Hlui zawlneite chuan hnam tun din lehna thu an sawi òin. Hnam thuthlung an sawi òin chu Pathian thupek anga an awm chuan Pathianin a chawimawi dawn tih hi a ni. Pathian hian mi mal chawimawi chauh hi a tum lo va, hnam pumpui chawimawia a awm theih nan thupek a pe òin a, chu thupek chu waviin thleng hian a la pawimawh reng a ni.

Mi ropui leh chak te, mi fìng te, infiammi te, mi mala thiamna neite chuan an hnam an chawimawi òin a. Chutiang mi chu mi tlemte an ni. Mipui nawlpuiin kan hnam kan chawimawi theihna chu keimahni òeuhah fel taka thil kan tih hi a ni a. Chutiang bawkin sualna leh fel lo taka thil kan tih pawh hian kan hnam a mualpho tihna a ni a. Sakhaw huang chhunga fel taka kan tih ngawt a tawk lo va, politics huang chhungah te, hnam dang leh ramdang mi laka kan thiltih te, thilsiam dang leh nungcha laka kan khawsak danah te fel taka kan tih hian kan hnam a dam ang a, kan hnam chawimawiin a awm mai dawn a ni.

## **KEIMAHNI**

### **Prof. Lalrindiki Ralte Visting Professor-ah a ñang**

i) June 24-July 17, 2023 chhung khan Visiting Professor tura an sawm Prof. Lalrindiki Ralte chu Tamil Nadu Theological Seminary, Madurai-ah Visiting Professor-ah a ñang.

ii) June 7, 2023 khan Senate of Serampore College (University) hnuaiia Senate Board of Studies meeting (zoom)-ah a tel a, Social Analysis Department convener-ah ruat a ni bawk.

### **Prof. Lalnghakñuami Paper present**

i) April 20-25, 2023 khan NCCI XXIX General Assembly, Henry Martin Institute Hyderabad-a neihah resource person-ah ñangin paper a present.

ii) May 23, 2023 khan NEICC Standing Committee Combine meeting on Northeast India Christian Statements, Synod Office-a neihah a tel.

iii) June 25 & 16, 2023 khan Serampore College-ah SATHRI buatsaih, Supervisor's Pedagogy Seminar-ah paper a present.

### **IACM Course-ah tel**

Rev. Prof. H. Vanlalruata, Registrar chu July 24, 2023 khan Serampore College-ah Senate of Serampore College (University) leh United Board for Christian Higher Education in Asia, buatsaih Indian Academy for Campus Ministry (IACM)-ah resource person-ah a ñang.

### **Librarian thar**

Pu H. Chalbuanga, Assistant Librarian, ATC chu Synod Service Board chuan Librarian-ah a kaisantir a. May 1, 2023 añangin Librarian hna hi a zawm.

### **Maria Lalmuanpuii dahnghet**

Nl. Maria Lalmuanpuiii, ATC Library-a thawk mek chu Synod Service Board chuan Office Assistant hna thawk turin a dahnghet a, Library-ah a thawk chhunzawm.

## College Annual Retreat

June 16, 2023 (Thursday) khan ATC-a zirlaite leh thawktu zawng zawngte pualin thlarau lam intuaitharlehna (retreat) neih a ni a, he hunah hian rawngbawltu (speaker) atan Rev. Dr. Ramengliana, General Secretary, NEICC, Shillong hman a ni.

## Mobile Theological School hawng

July 15, 2023 khan Biata Pastor Bial Inkhawmpui thurel bawhzuiin Biata Kohhran Hall- ah Mobile Theological School hawn a ni a, he hunah zirtu mi 104 an tel a, mi 39 te chu exam tura in-register an ni nghe nghe a. He hunah ATC ațangin zirtirtu - Rev. Prof. H. Vanlalruata, Rev. Dr. F.H. Liansangzuala, Rev. Dr. Laldingluaia te an kal.

## College Week

June 26-30, 2023 chungin College Week hman a ni a. Sport item chi hrang hrang hmanga intihhlamna hun hman a ni a. Zirlai, zirtirtu, thawktu leh campus member-ten hlim takin hun an hmang.

## Mizoram Kraws Lian Campaign

Mzoram Kraws Lian chu sak chhonzawm zel a ni a. Din tum a nih chhan te, kan thlen chin leh a pawimawhna te kohhran hote hnena hriattir leh he rawngbawlnaa tel ve tura sawmna (campaign) hun hmangin ATC zirtirtute chuan July 16 ațang khan hun an hmang tan a. Aizawla kohhran hrang hrangte hnenah Synod-in a ngen angin campaign hun hman a ni a. Tunah hian hma la chho zelin kohhran hrang hrangah hman chhoh zel tum a ni.

## Senate Result chhuak

Senate of Serampore College (University)-in B.D. leh M. Th. final year result a tihchhuaha ATC dinhmun chu hetiang hi a ni.

B.D.			M. Th.		
S/No	Grade	No of Students	S/No	Grade	No of Students
1	A-	17	1	A-	15
2	B+	11	2	B+	12
3	B	1	<b>Total</b>		<b>27</b>
<b>Total</b>		<b>29</b>			

## PARTY POLITICS RUIHCHILHNA

- Rev. Dr. FH Liansangzuala

### Thuhmahruai

Mipuiin an aiawh an thlan chhuahten ro an rêlna (democracy) hi political party tel lovin a kal thei lo va, a tel lo chuan sorkâr a siam theih loh, ti ila kan sawi sual awm lo ve. Chuvângin, ram inrêlbâwlina leh inenkawlina mumal tak a awm a, sorkâr chak leh chhawmahawm tak a din theih nân political party hi a pawimawh a ni. He a pawimawhna leh a lova kan awm theih lohzia hi mipuite pawhin kan hriat chian a ngai a. Political party pawimawhna hriain party laka rilru fim tak kan put pawh a pawimawh a ni. Amaherawhchu, political party hi ram inrêlbâwlina leh inenkawl fel leh ða kan neihna tûra hmanrua a ni tih ngaihtuah lova, a party-a zâwk kha ruihchilh leh atchilh bur mai theih a ni a. Chutiang mite chuan ram leh hnam inrêlbâwlina leh inenkawlina te, ram hmasâwnna leh changkâna lam aiin mahni mimal leh party bil ðatna leh hlâwkna an ngai pawimawh hmasa fo va. Hetianga party ruihchilhna leh a ruihchilh mite hi ram ðanmawhbâwk, hmasâwnna dâltu an nih avângin mipuite kan fimkhur a ngai a. Chuvâng chuan party ruihchilhna hi kan hnualsuat ngam a ngai a ni.

He article-ah hian political party awmzia te, an hlutna leh pawimawhna te, party ruihchilh awmzia leh a ðat lohna te kan târ lang ang a. Party ruihchilhna laka kan fihlim theihna tûra thil pawimawh tlêma zâwngin a hmâwr kan bâwk dâwn a ni.

### Politics

*Politics* tih hi Grik ðawng *politikos* tih aţanga lo piang a ni a. Hmasâng Grik ram khawpui inawpna leh ro inrêlna chungchâng sawina a ni.<sup>1</sup> Mi thiam tam takin politics awmzia hi sawi fiah an tum a, hrih fiahna hrang hrang pawh a tam hlê. Chûng an hrih fiah dânte chu hetiang hian han khai khâwm dâwn ila: “Politics chu mihringte awmze nei leh kawng hmang fel tak neia kan nun ho

theihna atâna inrêlbâwlna hi a ni a. Ram leh a chhûnga chêng mipuite khawsak ho dân tûr leh hma lam pana lungrual taka an kal ho theih dân tûr ngaihtuahna hi a ni,” ti ila a dik mai âwm e. Tawngkam danga kan sawi chuan, “Mihring kan nih anga kan chên ho leh khawsak ho dân tûr ngaihtuahna hi politics chu a ni,”<sup>2</sup> tiin kan sawi thei ang.

Hman dân tlânglâwn takah chuan Politics chu ram rorêlna leh sorkâr leh mipui inlaichînna chungchâng sawina a ni ber a. Chutih laiin, mimal nun te, inchhûngkhur te, sakhua leh hnam nunphung te, hrisêlna leh zirna te, sumdâwnna leh ei leh bar ngaihtuahna thlengin a nghawng vek a. Tu mah hi politics aţang hian inlâk hran theih a ni lo va, râlân tak tak theih a ni lo. Kan duh emaw, duh lo emaw, politics tui luang hian mi tin hi min hrûtin min lèn tel hrim hrim a ni. Chuvângin, khua leh tui ţa chuan politics hi ngaihthaha, hnuchhawn mai theih a ni lo. Ram inrêlbâwlna tluang taka a kal a, nun hona ţa a awm a, hmasâwnna duhawm tak a awm theih nân sorkâr kalphung leh politics hi ngaihvena, ngaihtuahna sên hi khua leh tui kan nih anga mi tin mawphurhna a ni.

### **Political Party**

Tûnlaia political party kan tihte hi kum zabi sâwmpakuana chho aţanga Europe leh America khawmualpuia mipui thlan rorêlna leh sorkâr lo ding chhovin a hrinchhuah a ni a.<sup>3</sup> Miin ram leh hnam tâna hmathlîr leh ruahmanna an neihte mipuite tâna phur chhuaka, tipuitling thei tûrin ram inrêlbâwlna leh sorkârna fawng chelhtu an nih a ngai a. Chumi atân chuan ram leh hnam tâna hmathlîr leh ruahmanna thuhmun vuantute chu inhlâwm khâwma, awmze nei taka hma an lak a ngai a ni. Chumi tûr chuan political party-te hi din an ni hlawm.

Tichuan, political party chu “ram leh hnam tâna tum, hmathlîr leh ruahmanna thuhmun nei, chumi tihlawhtling tûra sorkârna fawng chelhtu nih tuma beia, chumi hmanga ram leh hnam tâna thawk tûra inhlâwm khâwm pâwlho a ni,” tiin kan sawi thei ang. Ram leh mipui

tâna ðha leh pawimawh nia an hriat azir te, an ngaih dân, an khawhawi leh thil thlir dân azir te, an pawl inawp dân leh inho khâwm duh dân inan loh avâng tein party hrang hrangte hi an lo piang a ni.

India ram hi political party awm zat tûr bituk awm lohna, party hrang hrang tam tak awmna (multi-party system) ram a ni a. Chuvâng chuan political party pawh tam tak a ding a, a zat bituk ngawt theih a ni lo.

Political party-ah hian mi chi thum pawimawh tak tak an awm a. Chûngte chu – 1) Party hruaitu leh a hnârkaitu, a hma tâwnga ding te; 2) party mi, a kûl a tâia party tâna ðhahnemngai taka thawktu te, leh 3) party mi naran, a kûl a tâia ðang lêm lo, party tâna nghet taka ding tlat si te, an ni.<sup>4</sup>

Party hruaitute hi party inrêlbâwlna fawng chelhtu, party policy leh manifesto te, a kalphung leh hmathlîr engkim duangtu leh kengkawhtu an ni a. Party hmêlh mang leh nihphung lanna berte an ni. Chuvângin, hruaitu ðha, chak leh hmathlîr nei thui an nih a pawimawh a. Party hruaitute ðat leh ðat loh leh chak leh chak lohah party hmakhua a innghat thui hlê a. Party âwn lam nei lo (neutral) mite ngainat leh rin zâwng an nih pawh a pawimawh hlê.

Party-a a kûl a tâia inhmang (party workers) te hi party hruaitute thachhangdâwltu, party tâna ðha thawhtu tak takte an ni a. Anni hi party chakna thahrui, mipui nâwlpuite hnêna party thiltum leh dinchhante puangzârtu, an party thlâwp tûr leh ðanpui tûra mite sâwma, hui khâwmtu ber an ni a. Hei vâng hian party worker neih ðat leh hlâwm khawm ðat hi party tinte tân thil pawimawh tak a ni.

Party mi naran te hi langsâr taka party-a inhmanga, party tâna thawk ni si lo, ngawi renga party tâna nghet taka ding tlat te an ni a. Mi dang hnênah an party an fakin an sawi mawi chiam lo emaw, an party-a tel tûrin mite an sâwm an sâwm lêm lo emaw a nih pawhin anmahni hi chu an awmna party tân an nghet tlat a. Party-a tel tam



ber hi hetiang mi hi an nih thìn avângin party chakna leh nghehna lungphùm pawimawh tak an ni.

### **Political party-te pawimawhna**

Mipui aiawh thlan chhuahten sorkârna siama, ram rorêlna an kenkawhna ram, India ram leh Mizoram state angah hi chuan political party-te hi sorkâr siamna tûra hmanraw pawimawh tak an ni a. Sorkâr that leh that loh hriltu pawimawh tak an ni. Lord Bryce-a chuan, “Inthlang ramah chuan political party-te hi a serh zînga a mei ang an ni. Tu mahin an tel lovin mipui thlan sorkâr an siam thei lo,”<sup>5</sup> a ti a. Robert MacIver-a chuan, “Political party-te tel lo chuan kalphung mumal a awm thei lo va, rorêl dân tûr ruahmanna fel a awm thei lo va, sorkâr siam tûra dân ang taka mipuiin an duh zâwng mi an thlan theihna tûra inthlanna awmze nei a awm thei hek lo,”<sup>6</sup> a ti bawk. Hei hian inthlang thìn rama political party pawimawhzia a tilang Chiang Hlê.

Party hi chhan leh vâng pawimawh tak neia awm leh ding a ni a. Chûngte chu tâwi tê têin han târ lang ila:

- a) Ram leh mipui hmasâwnna tûra hmathlîr thui tak neia ruahmanna (policy) duan hi party-te tih tûr leh awm chhan pawimawh tak a ni.
- b) Ram leh mipuite thatna tûra an ngaih pawimawh leh an tih tûr târ lanna siama, an policy a taka an tihlawhtlin dân tûr ruahmanna (manifesto) mumal tak siama mipui hnênah zawrh chhuah hi an hnapui a ni bawk.
- c) Chu policy leh manifesto hmang chuan mipuiten ram leh mipuite tâna tha tûr nia an hriat party-te thlang thei tûrin kawng a hawsak a ni.
- d) Sorkârna siamtua an tan chuan an policy leh manifesto ang ngêia ram leh mipui hmasâwnna tûr leh hamthatna tûra thawh chu sorkâr mawhphurhna a ni a. Chutiang taka sorkârin a thawh theihna tûr chuan rorêl lai party bâkah party dangte pawhin sorkâr thawhpui hi an awm chhan leh mawhphurhna pawimawh tak a ni.

e) Sorkârna siamtu an ni lo a nih pawhin sorkâr khalh ngil tûra beih hi an mawhphurhna a ni a. Sorkâr leh sorkârna siamtu party-ten dik lo taka thil an ti tûr vên a, sawisêl ngai sawisêl te, fak tlâk faka, tãwiãwm a tûl huna tãwiãwma mipui tâna ding zêl tûr an ni.<sup>7</sup>

Kawng danga kan sawi chuan political party-te hi mipuite hamthatna tûr leh ramin hma a sãwn theihna tûra a fawng chelhtu pawimawh tak an ni, tiin kan sawi thei ang.

A leh lamah chuan political party-ten an tih tûr an tih loh avâng te, an tih loh tûr an tih avâng tein ram inrêlbãwlina leh sorkâr kalphung a buarchuarin a buai nuai thei a. Hmasãwnna kawng zawh lovin hnungtawlh zãwngin ram a kal phah thei. Party system-in a tãa lo zãwnga nghawng a neih theih dân kawng hnih khat lek han tãr lang hmasa ila:

a) Mahni party hamthatna tûr leh hlãwkna tûr chauh ngaihtuaha sorkârna fawng chelha thuneihna chan ringawt tumna avângin ram mipuite zingah inrem lohna te, inthen hranna leh innghirnghona te a thlen phah thei.

b) Inthlannaah pawh dik lo leh fel lo taka thiltih pawisak lohna te, mipuiten zalên taka vote an thlãka ram hruiatu an thlan theihna kawng dip zãwnga chêtina leh sorkârna an siam hnuah pawh hlemhlêtna leh mahni hmasialna tihuangtautu an ni thei bawk.

c) Party mi leh sa leh lamtangte chauh duhsakna leh party dang mite thlauhthlãk duhna a thlen a. Chu chuan sorkâr ngêi pawh chu mipui sorkâr aiin party sorkâr ni tûrin a siam tshin a ni.<sup>8</sup>

Hetia party avãnga harsatna awm thei kan sawi avâng hian political party-te hi nuai bo vek an ngai tihna erawh a ni lo. Mipui aiawh thlan chhuahte rorêlna sorkâr chu political party-te tel lova a awm theih loh avângin party kalphung leh kan kalpui dân hi her dik a, siam that zêl a ngai zãwk a ni. Chumi tûr chuan political party hi ruihchilha, atchilh mai lovin, rilru fim tak leh ngaihtuahna thiang tak nên politics leh party hi kan thlir a ngai a ni.

### **Party ruihchilh awmzia**

Mipuiin an aiawha rorêltu tûr an thlanna rama political party-te pawimawhna kan sawi rual hian harsatna siamtu an nih theihna kawng tam tak a awm a. Chûng zînga langsâr leh huathlala ber chu *party ruihchilhna* hi a ni. Mahni party chauh dik leh ða bera ngai a, party dangte tlin lohna hmu langsâr tûr te, mahni party thiltih a nih chuan dik lo thei lova ngaia, engti zawng pawha mahni party leh a thiltih chu ðan rum rût mai tûrin party hrang hrangte hian an member-te hi an duh vek a ni ber a. Chutianga a dik a dawk pawh thlu thei lo leh a chhia a ða pawh thliar hlei thei lo khawpa mahni party ðan leh atchilh bur mai chu party ruihchilh chu a ni a. Chutianga party ruihchilh mite chuan politics awmzia bosalin, mahni hmasialna leh ðanghma haina rilru pûin party-ah an tel a. Politics hi ram leh mipui rawngbâwlna a nihna ngai pawimawh lovin mahni mimal leh party hlâwkna ngawt ûmna hmanruaah an hmanng ðhîn. Hei hi ram leh mipui tân a ða lo êm êm a. Ramin hma a sâwn a, changkâna kawnga ke a pên tibahlahtu a ni thui êm êm a ni.

### **Party ruihchilhna awm chhan**

Party ruihchilhna hi eng vânga lo awm nge, tih hi zawhna pawimawh tak a ni a. Chhâna hrang hrang awm thei zîngah kawng hnih khat lekin han chhâng ila:

#### **a) Politics awmzia kan hriat chian loh vâng**

Politics hi ram leh mipui rawngbâwlna huang a ni a. Chutih laiin party-a inhmang tam tak hian thuneiha leh lalna inchuhna hmun, mahni ðanghma haina leh mahni inhai vûrna huangah kan ngai niin a lang. Hei vâng hian dinhmun ðaa min dintîr a, sum leh pai leh therhlo eng eng emawa hlâwkna min petu nia kan ngaih political party hi kan ruihchilh a. Chu party aţang chuan politics chhe mi kan khêl a ni, ti ila a sual tam âwm lo ve. Hêng mite hian politics awmzia tak tak, ram leh mipui rawngbâwlna, mahni insenso leh hah pawh huama thawhna huang a ni tih hi hre Chiang sela chuan a hmanrua political party hi an ruihchilh ngawt lo deuh âwm e.

### **b) Political Party awm chhan kan hriat loh vâng**

Political party awm chhan pawimawh tak chu ram leh mipuiten hma an sâwn theihna tûra policy leh manifesto ða duang chhuak a, chu policy leh manifesto chu a taka tihlawhtling tûra beih a ni a. Hei hi hre lovin mahni hlâwkna leh hamðatna hmanrua atân political party hi mi tam takin hman an tum ðîn a ni. Chuvâng chuan, political party awm chhan aia mahni duh zâwng tihpuitlin ngai pawimawhtuten party hi an ruihchilh a, an sahuai thing vawn fo ðîn a ni. Party awm chhan chu ram leh mipui tân a ni tih hriain party-a kan awm a nih pawhin ram leh mipui rawngbâwl hi party-a kan awm chhan a ni tû a ni ang.

### **c) Ram leh hnam aia mahni hlâwkna kan ngaih pawimawh vâng**

Mi tam takin party an zawma, party-a an inziah luh chhan chu mahni ðanghma haina vâng, party zar zova, eng emaw therhlo hmuh leh chan beisei vâng a ni thui hle. Hêng mite hi chuan ram leh mipui rawngbâwl te, ram tâna mahni insênso leh ram siam ðatna te hi an vei phâk lo fo. Contract eng emaw leh sum leh paia hlâwkna thlîrin an party-ah saruh ruhin an ruh ve bur mai ðîn a. An party thiltih ða lo leh fel lo deuh pawh hmu se an haw ngam lova, an sawisêl ngam hek lo. An beisei ber hlâwkna leh hamðatna an chôn ang tih hlaubin thil ða lo leh dik lo pawh an uipui tui lian thlîr tawp mai ðîn a ni ber.

### **Party ruihchilh ðat lohnte**

Party ruihchilhna hian nghawng ða lo tam tak a nei a. Chûng zînga a langsâr zual chu han târ lang ila:

#### **a) Thluak fim a tinû**

Party ruihchilhna hian thluak fim a tinû a, ngaituahna a titâwi ðîn. Thil dik leh dik lo te, a ða leh ða lo leh a mawi leh mawi lo tehna thlengin a tibuai ti ila a sual lo vang. Ram leh mipui tâna ða tâwk lo pawh mahni party thiltih a nih chuan a sawi mawitîr a. Chutiangan, mi dang leh party dang thil tih ðat pawh ða tihpui thei lovin rilru kawi a puttîr ðîn. Mahni party mi leh sate dik lohna te,

an thiam lohna leh an tih sual ngêi pawh sawi mâm an tum lui tlat a. Party hotute duhsakna dawn duh leh beiseiin a mawi leh mawi lo pawh thlu lova tlawn leh tlâk tlum tum rêng rêngin a hmanhlehtîr thîn a ni. Hei hian mihring hlutna leh zahawmna a tihniam a, mite nuihzat burah mi a siam thei tih hi hriain mi pangngai chuan party ruihchilhna hi chu bânsan vang vang chi a ni.

### **b) Mipui sorkâr aiin party sorkâr min neihtîr**

Party ruihchilhna a ken tel chu mipui sorkâr ni lova party sorkâr siam hi a ni. Sorkâr mawhphurhna chu mi tu mah thliar lova mi tinte thât tlânna tûra thawh a ni a. Sorkârna siamtute hi party mal candidate, party ticket-a ding, party kaltlanga mipuiten an thlan tlin ni mah sela sorkârna an siam hnuah chuan party sorkâr ni lovin, mipui sorkâr, party daidâna bangin a khur khung loh, mi tin huapzo sorkâr a ni tûr a ni a. Amaherawhchu, party ruihchilhna avângin he sorkâr nihphung hi bosalin, party-in a thunun, party sorkâr tih mai theihah an chhuak leh mai thîn. Hei hi thil pawl tak a ni. Mipui sorkâr ni pha lo, party sorkâr ni zâwk âwm tak sorkârnaah chuan rorêlna a khai rual lo va, mipui an hlim lo va, hmasâwnna ke a bai phah thîn a ni. Chuvângin, sorkâr tha, rin ngam leh mipui inngahna tlâk sorkâr siam tûrin party ruihchilhna tui nûin a pawlh buai loh ram hruaitu leh mipui hi kan mamawh a ni.

### **c) Hleih neia rorêlna a tingampa**

Party ruihchilhna a nghawng chhuah pawl tak chu hleihneihna, duhsak bîk leh thlauhthlâk bîk neihna hi a ni. Sorkâr-a hamthatna leh zâr zo tûr awmah mahni party mi leh sa te chauh duhsakna leh mi dangin zen tawm ve theih lohin thil a awm phah thei. Sorkâr hna lâkah te, contract hna pêk leh thawh chungchângah te a tling leh hna thawk tha thei tûr aiin ruling party mi leh saten duhsak an hlawh phah fo va. Hei hian rilru thianghlim leh theihtâwp chhuaha bei ve hrâm hrâm thînte rilru a tihnualin, a tibeidawng a. Sorkâr rin ngam lohna leh sorkâr laka rilru hel a puttîr thei a. Hetianga mi beidawng hi an tam zêl pheih chuan ram leh hnam hmakhua atân thil pawl lian tak a ni thei a ni.

#### **d) Politics a tihminghliau**

Politics hi khawvêla kan awm chhông chuan ram leh mipui inrêlbâwlina atâna Pathian min pêk hmanraw pawimawh tak a ni reng dâwn a. Mihring nun hona tinuam-a, tihmasâwn-a, inlungual leh inhmangaih tlang taka hma lam pana ke min pên hotirtu tûr a ni a. Mahse, party ruihchilh miten politics hi an tihmêlhem in an tihminghliau va. Politics huang chu thuneiha leh lalna inchuhna hmun, mi duhâm leh pamhamte inlulinna mual, Pathian ãih mi leh rawngbâwltute tân chuan tel vêna tlâk loh hmun bawlhhlawh tak angin mi tam takin an ngaih phah ta a ni. Chuvâng chuan, mi tam tak rilruah chuan politics kan lam rik zâwng pawhin thil ãha lo lam hi a langsâr nghal fo ãhîn a. Dâwt sawi leh thil dik lo tih pawl lohna hmun, mahni hlâwkna leh hamãhatna ûma intlansiakna leh ‘kei, kei, kei’ tia a chuha inchuhna hmun angin kan ngai deuh tlat. Mihring nun hona leh inlaichinna ãha a awm theihna tûra Pathian hmanrua politics chu party ruihchilhtute inham puar vêlna avângin thil tenawmah a chhuak mêk a ni, ti ila kan sawi sual âwm lo ve. Chuvângin, party ruihchilhna hi kan politics tichhetu, ram leh hnam ãhanmawhbâwk a ni tih hi hriain kohhran mite hi chuan kan malmâk ngam a ãtûl êm êm a ni.

#### **e) Ram hruaitu ãha tehna a tibuai**

Party ruihchilhna tui nûin a pawlh buai lohna hmunah chuan hruaitu ãha chu huapzo rilru pu, mi rethei leh hnuaihningte ngaihsaka, khai chhuaktu, ram hmasâwnna atâna tu mah duhsak bîk leh thlei bîk nei lo thei ang bera rorêltute hi an ni a. Mimal emaw, party mal ãhat fâlna aiin hu ho ãhat tlânna tûr an ngai pawimawh ãhîn. Amaherawhchu, party ruihchilhna tui nûin a pawlh nasatna hmunah chuan ram aiin party-in ngaih pawimawh a hlawh hmasa a. Mahni party mite duhsak bîkna leh vûr bîk duhna a lian fo. Ram pum ãhatna tûr leh a mamawhtu tak takte hnên thleng phâka hmalâk aiin mahni party mite leh lainate lam hawia hmalâkna a nasa ãhîn a ni. Chutianga party tân leh party mite tâna huamhauh thiam apiang chu party ruihchilh mite chuan hruaitu ãha leh chhenfâkawmah an ngai

thîn. A nihna takah chuan chutianga party bil leh mimal emaw, khaw bil emaw, tlângdung bil emaw duhsaka vûr chîngte chu hruaitu ða an tling lo va. Chutiang rorêlna chu rorêlna ða a tling hek lo. Politics dik leh rorêlna ðaah chuan chhûngkaw bil te, khaw bil leh party bil ten an hlâwkpuî thûr thûr lo a nih pawhin ram tân leh mipui nawlpui tân, a mamawhtu tak takte hnên thleng phâka thiltih leh hmalâk a nih phawt chuan ram mipui zawng zawngten a hlâwkna an têt tlâng a, an lungawi tlâng êm êm thîn a ni. Chuvângin, duhsak bîk leh hleih nei taka rorêl duh mite hruaitu ða anga min hmuhtîrtu party ruihchilhna hi hnâwlin, ram hruaitu ða tak tak leh tak tak lo thliar thiam, hre thiam tûrin rilru fim leh thianga kan put a pawimawh a. Chutiang rilru fim leh thianga pu kan tam poh leh kan ram hruaitute leh politician-te hian ðat loh leh mipui mit tlun loh an hlau deuh deuh dâwn a ni.

#### **f) Inlaichinna leh inthenawm khawvênna boruak a tichhia**

Party ruihchilhtu thinlungah chuan mahni party mi leh sate lo chu mahni chhûngkhat laina leh thenawm khawvêngte pawh ni se en hranna leh hmuhmawhna rilru a awm fo thîn a. Inunauna leh inlaichinna ða a awm theih loh phah thîn. Party ruihchilhna avânga unau inngimgho te, thenawm khawvêng intai tlat mai te hmuh tûr an awm fo. Mizo pipute chuan, “Mahni thenawm do ai chuan khaw sarîh do a thlanawm zâwk,” ti hialin thenawm khawvêng inlaichinna ða neih hlutzia an sawi a. Tûnlai chhanah erawh chuan kan hnam rohlu, thenawm khawvêng inhmangaihna leh inlaichinna ða neih chu party ruihchilhna avângin kan mausam a, kan palzût a ta ni ber. Hei hian khawtlâng nun hona boruak a tichhia a, khawsak hona boruak a tihrehawm a ni. Chuvângin, khawtlang nuam leh inthenawm khawvênna boruak ða kan neih zêl theih nân a tihrehawm a, tichhe theitu zînga mi party ruihchilhna hi kan hnualsuat ngam a pawimawh a ni.

#### **g) Rinna leh thlarau nun a nghawng**

Pathian rawngbâwlnaah party ruihchilhna avânga rawngbâwlpuite hmuhmawhna leh en hranna rilru pu an awm fo.

Mahni party mi leh sa an nih loh vâng emaw, an party thiltih dik lo nia lang an sawisêl avânga rawngbâwltu dangte thusawi leh rawngbâwlina thiltih mêna thlâk-a ngaihnêpsak tâwk pawh an awm thîn. Chutiang rilru pu chung a rawngbâwlina fawng chelh ve hrâm hrâmtu tân chuan mi dangte tâna chhenfâkawm rawngbâwlina neih a har a. Thawhpui leh rawngbâwlpui an nuam lovin, rawngbâwl hnaah an inpe tak tak thei lo. Pathian leh mihring hmaah an huaisen lo va, mi dangte tichak tûr leh hruai ngîl tûra Pathian mi hman tak an ni mawh hlê a ni. Chuvângin, Pathian rawngbâwltu tân chuan politics luh chilha, party-a inhman pawhin rilru fim leh thianghlim takin, Politics leh party huang pawh hi Pathian rawngbâwlina huang pawimawh tak a ni tih hre chung a inhman a pawimawh a. Party ruihchilhna tui nûah inchi ah ve hauh lo tûra invên fimkhur êm êm a tûl a ni.

### **Engtin nge partyh ruihchilhna kan um bo ang?**

Political party ruihchilhna a nghawng tha lo kan han sawi bâkte pawh hi tam tak sawi tûr a la awm ang. Chutih lai chuan thil pawimawh zâwk chu a siam that dân tûr lam hi a ni a. Kawng tam tak sawi tûr a awm ang a, chûng zînga tlêma zâwng chu han târ langila:

#### **a) Politics hi Pathian rawngbâwlina huang a ni tih pawm**

Kohhran mi leh rawngbâwltu tam takin politics kan thlîr dân hi siam that ngai a awm ve niin a lang a. Khawvêl thil, thuneihna leh lalna in chuhna mual, ringtu leh rawngbâwltute tel vêna tlâk loh hmuha hmu pâwl hi mi tam tak kan awm a. Rawngbâwltu eng emaw zat hi chuan Bible thu thênkhat, *“Tu mahin hotu pahnih rawng an bâwl kawp thei lo ... Pathian leh sum rawng in bâwl kawp thei lo ve,”* (Mt 6:24) tih te, *“Kaisara thilte chu Kaisara hnênah pe ula, Pathian thilte chu Pathian hnênah pe rawh u,”* (Lk 20:25) tih te leh a dangte tlawh chhanin politics hi chu Pathian rawngbâwlina huang pawn lamah kan dah deuh hlawm niin a lang a. Mahse, he ngai dân hi a dik tâwk lohna tam tak a awm. Politics huang leh sakhua



huang thliar hrang-a, nun dân chi hrang hrang nei tûr kan ni lo va. Kan awmna apiang, kan tih engkim leh kan thawh engkim hi Pathian rawngbâwlna remchâng, Pathian thu leh duh dân kan lan chhuahtîrna hmunah chantîr tûr kan ni a. Chuvângin, Kohhran mite hian politics pawh hi Kohhran huang chhûng ang thova Pathian rawngbâwlna huang, Pathian thu leh duh dân kan nun chhuahpaina hmun pawimawh tak a ni tih kan hriat hi thil pawimawh tak a ni. Chutiang a nih loh va khawvêl thil, Pathian mite tel vêna tlâk lohva kan ngai lui tlat a nih chuan chumi huanga awmte leh rorêltuten dik lo leh fêl lo taka an ti a nih pawhin engmah sawi theih kan nei dân lo a ni.

### b) Dikna leh rinawmna ÷an tlat

Party ruihchilhna hri ÷a lo umbo tûra thil pawimawh tak pakhat chu dikna leh rinawmna dinpui tlat hi a ni âwm e. England Prime Minister hlui Winston Churchill-a chuan, “Khua leh tui dik leh rinawmte hi ramin a neih theih ro hlu berte an ni,” a lo ti a.<sup>9</sup> Chutiang mite chuan party ni lovin ram leh hnam ÷atna tûr an buaipui a, chhawmahawm takin thil an ti mai ÷hîn a ni. Chutih laiin, miin ram leh hnam ÷awng chhana hmanga party a ruihchilh si chuan chu mi chu chinghne beram vun sin, hmangailtu der, ram tâna mi hlauhawm tak a ni ngêi ang. Chuvângin, ram leh khawtlang hruai hna kan thawk emaw, contract hna kan thawk emaw, sorkâr hna kan thawk emaw, kan sumdâwng emaw, hmasâwnna tûra sorkâr ÷anpuina hmanga hna kan thawk a ni emaw, eng pawh ti ila, khawiah pawh awm ila, mi hmuh leh hmuh lohah pawh dikna leh rinawmna nêh ÷a taka thawh leh thiltih hi khua leh tui kan nih anga kan bat a ni a. Chutiang mite chuan mahni hmasialna avâng a party ruihchilhna tui nûa lo inchiah ve chu an hman lo va, inchiahna tlâkah an ngai hek lo. Chhan leh vâng ÷a leh ropui zâwk, ram leh mipuite tân chhenfâkawm takin hna an thawk mai ÷hîn a. Hetianga dikna leh rinawmna dinpuitu mi tam zâwk an lo chhuah zêl theih nân mipuite pawh hian an phû ang ngêia fakna leh chawimawina kan pêk a, dik lo leh fêl lo taka tih chîngte erawh kan endawng ngam a pawimawh êm êm a ni.

**c) Mimal leh chhûngkua aia ram pum thatna dah pawimawh**

Mimal leh chhûngkaw hamthatna leh hlâwkna aia ram leh hnam hmangaih leh a thatna ngaih pawimawh nachâng hriat hi Mizo mipuite thanharhna tûr pawimawh tak a ni. Ram leh hnam hmangaiha, a thatna tûr duh tak taktu chuan party a ruihchilh hman lo va, mahni hma a sial hman hek lo va, ram tân a phâk ang tâwkin theihtâwp a chhuah zâwk thîn. He ram lo hi ram dang kan nei lo va. Chuvângin, hmangaiha a thatna tûr leh hmasâwnna tûra mahni theih tâwk sâng ber chhuah hi khua leh tui kan nih anga kan mawhphurhna a ni tih hre Chiang ila. Ram pum that tlânna tûr aia mimal leh chhûngkaw bil emaw, mahni party bil emaw, khua/vêng bil emaw thatna tûr chauh kan ngaihtuah theuh chuan kan ram hi chênna tlâk lovah kan chhuah ang a. Chutianga kan ram hi kan tichhia a nih chuan mahni hmasialna avânga kan ram thau sâwka ei chhetute pawh hi a tuartu kan ni vek dawn tih hi kan hriat reng a pawimawh a ni.

**d) Political Party kan thlîr dân leh kan telna rilru siam that**

Inthlang ramah chuan political party hi inthlanna felfai kan neih theihna tûr leh sorkâr siamna atâna a hmanraw pawimawh ber zînga mi a ni a. Chuvâng chuan, political party-te hi a pawnga puia hnâwl emaw, hnualsuat emaw, ngaihtheih loh emaw ngawt tûr a ni lo va. Khawi party emaw-a member pakhat lo nih ve hi inhmuhmawhna chhan tûr a ni hek lo. Amaherawhchu, party ruihchilhna tui nû erawh hi chu kan politics leh ram rorêlna tichhetu a nih avângin khua leh tui tha chuan pawmzam hauh loh tûr a ni. Ram siam thatna leh mipui mimir hmasâwnna tûr thlîr rânin political party-ah kan tel a pawimawh a. Chumi atân chuan kan awmna party chuan a thawk tha tâwk lo emaw, hleih nei taka thil a ti emaw a nih chuan chu party chu sahuai thing vawna vawn kher hi kan ba lo tih hriain kan hawisan ngam pawh a tûl ang. Party-a kan tel chhan leh kan telna rilru hi lalna leh thuneihna chan duh vâng emaw, sorkâr thau sâwka hamthatna dawn beisei vâng ni lovin, ram leh mipui thatna leh hmasâwnna duh vâng ni phawt mai se. Chu chu politics-a mi vengva, khua leh tui tha kan nihna kawng pawimawh tak a ni ang.

## Tlângkawmna

Israel-ten an ram chu Pathian hnên ațanga an dawn leh an rochun nia an ngaih avângin an ngaihlu a, an ram hmangaihna rilru pawh an pu lian hle. An ram țăatna tŭr leh hmasâwnna atân mawhphurhna lian tak neiah an inngai a. Chuvâng chuan, an ram tâna an inhuamna pawh a sâng a, an nun hial pawh an hlan phal țin a ni. Hetiang rilru hi Mizo mipui nâwlpuite pawh hian pu vên kan ram hi duat tak leh hmangaih taka enkawl hi kan mawhphurhna a ni tih hi pawm nghet ila. Țha taka ram enkawl hi Pathian laka kan bat, a rawng kan bawlna a ni tih hi pawm thlap ila. Chutiang rilru pu chung chuan politics hi khêlin political party-ah hian tel ila kan politics khelh dân leh party-a kan telna rilru hi chu a fîm deuh deuh ang a. Chutih rual chuan mahni hmasialna leh hamhaina avânga party ruihchilhna tui nŭa inchiah a, a dik a dawk pawh thlu thei lova âț sona lak ata kan fihlim deuh deuh thei ang.

## Endnotes

<sup>1</sup>“Politics” in <https://www.merriam-webster.com/dictionary/politics> (25.4.2023).

<sup>2</sup>H. Vanlalhluna, “Political Education – Tunlai Mizoram Mamawh” in *Mizoram Politics*, ed. C. Biakmawia (Aizawl: Synod Social Front, 1992), 52.

<sup>3</sup>Maurice Duverger, “Political party” in *Encyclopedia Britannica*, January 5, 2023. <https://www.britannica.com/topic/political-party> (25.4.2023).

<sup>4</sup>“Political Parties” in [https://www.toppr.com/guides/political-science/political-parties/politics/#Introduction\\_to\\_Political\\_Party](https://www.toppr.com/guides/political-science/political-parties/politics/#Introduction_to_Political_Party) (25.4.2023).

<sup>5</sup>James Bryce, *Modern Democracies*, vol. 1 (New York: Macmillan, 1964), 125.

<sup>6</sup>Robert M. MacIver, *The Modern States* (Oxford: Oxford University Press, 1962), 390.

<sup>7</sup>For detail discussion, see Prem Arora, *Political Science: Comparative Politics* (New Delhi: Cosmos Bookhive, 1993), 46-48.

<sup>8</sup>Cf. Arora, *Political Science: Comparative Politics*, 48-49.

<sup>9</sup>As quoted in K. Lallawmzuala, *Ram Rorêlna mipui mawhphurhna*, SF Booklet No. 38 (Aizawl: Mizoram Synod Social Front Committee, 2013), 16.

## PAULA LEH THILSIAM DANG HUMHALH

- Rev. Michael Zorinpuia

### Thuhma

Fur laiin tui renchem tura thuchhuah a awm tlat mai kha a mak riau! Tlawng tui a nut em avangin tui lak hleih theih a ni lo an ti a. Hetiang taka a nut chhan hi kawng leh thildang siamna atanga lei kan paih nasat avang niin an sawi; a dikna chen a awm ka ring. Kan ram leilung kan khawih danglam nasa ta em mai a. Chu chuan nghawng nei zelin nungcha leh ramngaw kan chan nasa viau ni-te pawhin an sawi thin. Mahse, kan rama nungcha leh ramngaw dinhmun lam hrim hrim chu kan khel dawn lo va; hemi chungchanga Bible thlirna lam kan chhui zawk ang. Bible pumpui kan en seng lo va. Thilsiam dang chungchanga Paula ngaihndan bik tarlan kan tum dawn a ni.

### Pathian hi thilsiamah a inpuang

Thilsiamte hmangin Pathian a inpuang thin tih hi Paula thukhawchang atangin kan hmu. Hei hi Tirhkohte Thiltih bung 14-ah kan hmu a, Rom 1:20-ah phei chuan chiang takin a sawi: “A thil hmuh theih loh (a chatuan thiltihtheihna leh a Pathianzia) chu khawvel siam tirh ata fiah taka hmuhin a awm a, thilsiamah chuan a lang a ni” tiin. A sawi zel danah chuan he inpuanna hi Dan neitu Judate hnenah leh Dan la hmelhriat lo Jentailte hnenah pek ve ve a ni.<sup>1</sup> Thilsiam zawng zawng hmanga inpuanna a nih avangin mi tu pawh a huap a, Pathian hmaah tu mah thiamthu sawi thei an awm lo tiin Paula hian a sawi a ni.

“Thil hmuh theih loh” tih chu Pathian “thiltihtheihna leh a Pathianzia” tiin Paula hian a sawi fiah a. Pathian nihna dik tak chu thilsiamah hian hmuh theihin a awm. Heti zawng hian sawi ta ila – Pathian nihna dik tak chu thilsiam hnualsuattuten an hre tak tak thei lo. Pathian inpuanna a nih miao avangin chumi-ah chuan mihringte tan leh thilsiam tan ngei ngei pawh chhandamna a awm a. Mahse

sual avangin chu chu thlen theih a ni ta lo va, Lal Isua Krista inhlanna a lo ÷ul ta zawk a ni (Rom 3:21-26). Chutiang khawp chuan chunglam hian thilsiam dangte hi a dah pawimawh a ni.<sup>2</sup>

### **Krista leh Thilsiamte**

**a) Kristaah thilsiam zawng zawng a infawk khawm:** Krista chu engkim intawh khawmna leh famkimna a ni (1 Cor 8:5-6). Hetiang deuh hian Kolossa-ah pawh Paula hian Krista chu engkim hnarkaitu a nihzia sawiin, thilsiam zawng zawngten an zawm tlat thu a sawi bawk (Col 1:15-17). Chuti a nih chuan kan vela thing leh mau, nungchate hi a siamtu Pathian nen an inzawm tlat a. Zawmpui pakhat an neih chuan anmahni pawh an inpêng tawn vek tihna a ni nghal bawk ang.<sup>3</sup> Kol. 1:15-ah chuan Krista chu “thilsiam zawng zawnga piang hmasa ber” tih a ni nghe nghe a. Hei hian khawvel leh a chhunga awm zawng zawng te chhungkhat ang maia an inpumkhatna a tilang chiang hle a ni. Thilsiamte leh Krista inzawmna hi mithiam Ridderbos-a chuan hmun danga Paulan Kohhran leh Krista inzawmna thu a sawi nen a inzul hle niin a ngai a (1Kor. 1:30).<sup>4</sup> Kohhran hian Krista aṅanga nunna leh chakna a hmu ang tho hian thilsiamte ÷obul leh nihna laipui chu Kristaah a awm a ni.

Hetah hian “Thilsiam zawng zawng” tih a nih avangin mihringte pawh kan tel vek mai a. Chumi chuan mihringte leh thilsiam dangte kan inpeng tawn a ni tih a nemnghet tel bawk awm e. Lal Isua lalna leh thuneihna, a thiltihtheihna hnuaiah chuan kan inpeng tawn vek a. Nungcha leh thing leh mau chunga hmasialna avanga pawisak nei lo taka che ÷hin chuan Kristaa kan inzawmna a pawisa lo tihna a ni tel thei a. Krista lalna a hriatthiam dan pawh inenlet a ÷ul hle tihna a ni ang.

Mithiamten kan chhehvela ramsa chi khat emaw, thing leh mau zinga chi khat chauh emaw pawh kan tikhawloh chuan a nghawng a zau hle tih an sawi ÷hin. Hmun ÷henkhata lei kan laih vak kha a pawina a lang nghal lo mai thei. Mahse tlawng tui nut chhan pakhat a lo ni daih thei a. Chumi chuan tui a ti harsa mai ni lovin, tui chhunga

nungcha khawvel (*river eco-system*) a tibuai vek thei bawk a ni. Chuti ang tak chuan kan chhehvela thilsiamte an lo inpeng tawn a ni tih hi Pathian thua kan hmuh a ni a. Khawvel thiamna aţang pawhin hei hi a dik thlap. Chuvangin kil khata thilsiam dang laka kan fimkhur lohna hian nghawng zau tak a nei tih hi kan hriat a ţul viau a ni.

**b) Thilsiam dangte tuarna leh Krista chhandamna:** Krista chu engkim bulpui a ni mai lo va, engkim zalenna leh chhandamna pawh amahah chauh a awm. Adama khawlohna avanga khawvel chungah sualin ro a rel tak thu Paulan a sawi a (cf. Rom. 5: 12) Hei hian a tira mihringte leh thilsiam inkara inzawmna thuk tak awmsa chu a ti khawlo ta a ni. Aawmzia chu, sual avang chuan mihringte chauh pawh ni lovin, thilsiam dang tinrengte pawhin an tuar phah ta tihna a ni (Gen. 3: 14-19; cf. Rom 8:19-23). Bible lehlin tharah chuan “chhiatna tawk tura tih” an nih thu kan hmu (Rom 8:20). A ţawng bul lam aţang chuan thilsiamte chuan siam an nih chhan an phak zo tawh lo va, riral mai tur an nih thu sawina a ni.<sup>5</sup> Chuvangin sual avanga mihringten kan tuarna chen chiah hian thilsiamte pawhin an tuar ve tih hi Pathian Thua kan hmuh dan a ni. Chutih lai chuan mihringte an khawlohna ata chhanchhuaha an awm rual chiahin thilsiam dangte pawhin chhanchhuahna an hmu ve nghal dawn tihna a ni bawk.

Hei hi Ephesi-ah pawh Paula hian a sawi a. Pathian remruat leh thil tum chu “engkim - vana thil awmte, lei chungah thil awmte pawh - Kristaa fawk khawm” hi a ni (Eph. 1:10). Kristaa chhandamna chu mihringte chauh ni lovin thilsiam dang zawng zawngte tan pawh a ni tih a chiang hle. Hei hi Pathian chhandamnain a tum chu a ni a. Chu chhandamna chuan engkim famkimna a kawka, chu famkimna chu Krista “engkima engkim” a nihna hmunah a thleng dawn a ni. (Col 3:11). Chuti a nih chuan, Paula rilruah chuan thilsiam dangte chungah hleilenna a thlen hunah leh duham avanga ngaihtuah lek lova mihringte kan chet hian Pathian thil tum daltu kan ni tihna a lo ni reng mai.<sup>6</sup> Chu mai chu a la ni lo va. Kristaa chhandamna chang tawhtu, amah thawhpuitute chuan thilsiam dangte nena kan

inkungkaihna thuk tak hi kan ngaihthah thiang lo va. Enkawl leh ven him chu kan tih tur pawimawh tak a ni tel a ni.

### **Thilsiamte nghahfak**

Nungcha leh thing leh mau chungchang sawi hi chuan Rom 8:18 chho vel hi sawi a ni fo thin. He thu hian mihringte leh thilsiam dangte inlaichin dan pawimawh deuh mai a keng tel a. Paula chuan “thilsiam” (Gk. *Ktisis*) chu mihring ang maia sawiin, Pathian fate lo lan hun tur nghakhlel taka thlir tawh tawh angin a tar lang a. Chang 19-a “nghakhlel” tih hi Greek tawng lam nen pawh a in zul tha hle a. Thil tha zawk lo thleng ngei tur, miin phur taka a lo thlir lawk thin ang hi a ni. Ring fan tawh tawh chung a lo thlir ang pawhin a sawi theih. Chang 20-ah chuan beisei bo takin thilsiamte chu awmze nei lo maiah sual avangin lo awm tawh mah sela, thil duhawm lo thleng ngei tur beisei tlat an nei tih a sawi. An tuarna chuan tawp hun a nei dawn.<sup>7</sup> Chu hun an beisei em em chu “Pathian Fate lo lan hun” chu a ni.

Mihringten Krista zara chhandamna a famkima an chan hun chu thilsiam dangte tan pawha chhanchhuahna hun a ni ve tlat a. Chutih rualin sual avanga mihringte khawlohna chu tunah hian an tuar ve mek bawh. Mihringten Kristaa Chhandamna kan beisei ang hian, thilsiamte chuan Pathian chhandamna chang tawhte lak atangin Krista avangin chhandamna an besei ve mek tihna a ni (Rom 8:21). Hei hian nungcha, thing leh maute chung a kan mawhphurhna sanzia a tilang chiang viau a ni.

### **Kan zir chhuah turte**

A chung a kan tar lan tak, Paula rilrua thilsiam dangte dinhmun atangin a hnuai mite hi kan zir chhuah tur pawimawh niin a lang:-

- a) Mihringte leh thilsiam dangte hian inlaichinna ril tak kan nei. Bul thuhmun kan ni a, sual hremna leh Kristaa Chhandamna huangah pawh kan inzawm thuk viau a ni.
- b) Mihringte leh thilsiam dangte inlaichinna hi kan ngaih pawimawh reng a tul. Khawvel hmasawna um luatna avang te leh duhawmna

avangtein mi tam takin ramngaw an tichereu a, nungcha an tihlum thin. “Mihring kan pawimawh ber” tih changchawia hetiang rilru pu hi Mizo-ah pawh an tam viauin a lang. Kan danglamna leh kan chungnunna hi ngaihtuah that fo a ngai. Thilsiam zawng zawng Kristaa kan inzawm khawmna tikhawlotu kan ni ang tih hi a hlauhawm hle a ni.

c) An beiseina thlen famkim hun tur chu thilsiam dangten nghakhlel takin an thlir a. Chumi tihlawhtling tura Pathian thuin mawhphurhna a pek chu mihringte hi kan ni. Chuvangin, nungchate leh thing leh mauten chhanchhuahna famkim an chan hun hi Kristian beiseina thu (*theology of hope*)-ah hian a tel tlat a ni.

d) Anmahni awmtirtu leh an bulpui chu Krista a nih ve miau avangin (Eph. 3:9; 1 Cor 8:6), mihringte hian nungchate leh thilsiam dangte hi kan nawm kan maka kan tihchhiat emaw kan tihhlum ve ringawt hi a rem lo. Tul lova tichhetu leh tihlumtu nih hi a Siamtu laka helna chi khat a ni thei.

### **Tawpna**

Han thlir thuk chuan Paula thuziakah hian *ecological concern* hmuh tur a tam viau lovin a lang a. Mahse kan han chhui tak chin atang chauh pawh hian thil siam dangte tana Chanchin Tha hi Paula a lo tar lang ve nual tho tih kan hmu. Pathian Thu a sawiin mihring chauh thlur bik lovin lei leh van, engkim mai hi a huap tel ve thin a. Krista lalna leh a chhandamna hnathawh hi Paula thuziak kan zir uluk deuh chuan mihringte bakah thilsiam dang zawng zawng tan a ni tih kan hmu a ni.

Sual avanga khawvel chhiat tawhzia sawi mah se, chu khawvel chu hawisan turin Paula hian min fuih lo. Kristaa hnehna avang chuan siamthat hna thawk a, chatuan beiseina duhawm tak chu khawvel leh a chhunga awm zawng zawngte pawhin an chan ve theihna tura bei turin min fuih zawk a ni. Kan ram leilung leh a chhunga awmte hi hmangaiha, dimdawia humhalh tlat hi Kristiante tih tur a ni a; Pathian Thu pawhin min zirtir dan a ni.



## Endnotes

<sup>1</sup> Edward Adams, *Constructing the World: A Study in Paul's Cosmological Language* (Edinburgh: T&T Clark, 2000), 156.

<sup>2</sup> Edward Adams, *Constructing the World:...*, 159.

<sup>3</sup> Brennan R. Hill, *Christian Faith and the Environment:...*, 93.

<sup>4</sup> Herman Ridderbos, *Paul: An Outline of His Theology*, translated by John Richard de Witt (London: ISPCK, 1977), 82.

<sup>5</sup> James DG Dunn, *The Theology of Paul the Apostle* (Grand Rapids Michigan: Wm B. Eerdmans Pub Co., 1998), 100.

<sup>6</sup> Brennan R. Hill, *Christian Faith and the Environment:...*, 96.

<sup>7</sup> Edward Adams, *Constructing the World:...*, 180.

## REVELATION

Inpuanna, inhriattirma, puan chhuahna tihna ni a. Pathian hi mihringte hian a nihna te, a ropuina te, a lalna te kan hrethiam tak tak lo va. Kan hriat thiam phak hi chu a then a zar chauh, tlem te a ni awm e. Hriatna famkim leh tluantlinga hriatna nei ni ta ila, Pathian aia ropui zawk nih hial a ngai awm e. Amaherawhchu mihringte mamawh tawh leh hriatthiam tawh chauhvin amah Pathian hi a inpuang a. A inpuanna hmanruaah chuan thil hrang hrangte pawh a hmang a, mahse kan hriat lar leh kohhrante pawm tlanah chuan Isua Kristaah te, Bible hmang te, Kohhran leh a hnathawh kaltlang te leh thil dang tein a ni. He Pathian inpuanna leh inhriattirma avang hian mihringin Pathian a hriat theihna tur kawng a inhawng ta a, amah biak te, amah nena inpawl te a lo theih ta a ni. Hei hi revelation an tihin a thu ken pawimawh tak chu a ni.

## THUTHLUNG THARIN INDONA CHUNGCHÂNG A ZIRTÎR DÂN

*Rev. V.L. Krosschhuanmawia*

Indo thuthang hriat tûr a awm fo mai a. Ram leh ram, hnam leh hnam indona hian nasa takin mihring nun leh khawsakna, ei leh bâr leh thilnung chi hrang hrang pawhin an tuar nasa hle a ni. Indona kan tih chuan ralthuam chi hrang hrang hmanga ram leh ram, hnam leh hnam inbeihna a kâwk a. Indona lian tham deuh leh lian tham lo deuh a awm thei ang. A lian tham lo deuh hi ralthuam hmanga intihbuaina (*Armed conflicts*) emaw *political conflict* emaw tiin an sawi thîn a. Ralthuam hmanga inbeihnaah mi 25 tal thihna a thlen chauhin *Armed conflict* anga ngaih a ni. Indona lian tham (*Major armed conflict*) chu ram hrang hrangte indona emaw ram chhûnga *political* buaina emaw a ni a. Mi 1,000 tal an thihin *Major Armed conflict* tia sawi a ni.<sup>1</sup> Hetiang khawvelah hian Thuthlung Tharin indona chungchâng hi engtin nge min zirtîr tih kan zirho dâwn a ni.

### **Indonain mihring nun a nghawng dân**

Indona hian mimal, khawtlâng leh ramah a lehlam lehlam pâwlah ngawng a neih nasat ve ve avâng hian hnehtu tak tak a awm theih lo ve an ti thîn. Indopui pakhatnaah khan mi maktaduai 17-20 vel thia chhût a ni a, Indopui pahnihnaah mi maktaduai 50-56 vel bawr (a then chuan maktaduai 80 an tling hiala ring an awm) thia chhut a ni bawk. Indopui a tâwp hnuah pawh indona avânga thihna chu a tâwp mai chuang lo. Kum 1989-2010, Cold War tâwp thleng khan mi 800,000 vel bawr lai thia sawi a ni bawk. Indona hian thihna mai a thlen lo va, rilru lam nasa takin a nghawng thîn. Hlauhna leh him lo riauva inhriatna a thlen bâkah rilru lama harsatna kawng hrang hrangin a thlen bawk. Râltlân a tipung a. UN Refugee Agency-in a târlan dânin kum 2022 tawp thleng khan mi maktaduai 108.4 râltlân awm nia sawi a ni a. An zînga zaa 40 % vel chu kum 18

hnuai lam nia sawi a ni nghe nghe.<sup>2</sup> Indona chuan tàm te, hrleng te leh natna chi hrang hrang a thlen a, râltlântê chu a tuar nasaah an tâng fo bawk.

Indona hian ram rorelna leh ei leh bâr nasa takin a nghawng bawk a. Sipai leh ralthuam tihhmasawwna lamah sum nasa takin a kal a, tui leh inkalpawhna lam a chhia a, thil man a sâng a, thil thawn chhuah leh sum peipunna lam a tlahniam a; chutih lain sum bat a pung thûr thûr thîn a. Hmasâwnna a muang a, dik lo taka hausate hnenah ram leh khawtlâng thil neih (assets) te chu a awm phah fo bawk. Hetiang taka indonain mihring nun a nghawng nasat avâng hian Thuthlung Thar lama indona chungchâng a zirtîr dan hi ngaihtuah ho a pawimawh tak zet a ni.

### **Indona: Thuthlung Thar thlîrna aţangin**

Thuthlung Thar-ah hian “indona” (*polemos*) tih thumal hi wawi 18 lai kan hmu a.<sup>3</sup> “Indo’ (*polemêô*) tih thumal hi wawi ruk kan hmu bawk.<sup>4</sup> Indona thu sawina tawngkam dang kan hmuh chu *machomai*, *machç* - inbei, inbeihna, inngihirngona, insualna leh inhnia tih hi a ni a.<sup>5</sup> Ral do emaw buan emaw (*pale*) tih hi wawi khat chiah kan hmu thung (Eph. 6:12). Heng bâkah hian sipai sawina leh sipai tehkhin thua hmanna kan hmu bawk. Thuthlung Hlui lama hnam leh hnam, ram leh ram indona thu ang hi chu Thuthlung Thar lamah hi chuan hmuh tûr a awm lo a tih theih ang a. Thlarau lam thil sawina atân awmze nei taka hman a ni thung.

Thuthlung Thara indona thu a sawi hi kawng thumin a then theih ang. Isua Krista leh Setana inbeihna lam hi Chanchin Tha bu lamah kan hmu a. Mimal nun leh Setana indona lam hi Paula lehkhathawn lamah kan hmu thung. Thupuan lamah chuan hun hnuhnung lama thil tha leh soal indona lam a sawi thung a ni. Chanchin Tha bu lamah hian Isua Krista rawngbâwlina chu Setana nena indona ang maiin sawi a ni a (Luka 4:1-13). Marka 3:27-ah chuan Setana tehkhin nan, Isua Krista chu milian - Setana phuar theitu leh hneh theitu a nihzia a târlang a ni.<sup>6</sup> Hetiang zâwnnga thlir hian Isua Krista

rawngbâwlna kawng hrang hrang, thuhrl, zirtîr leh tihdamna thlengin Setana lalram thiat tura beihna a ni tizâwng pawhin a ngaihtuah theih ang. Setana lalram thiat tûra indona chuan thlarau lam chauh a huap lo va, thlarau lam leh ni tin nun leh ei zawna kawng hrang hranga mihringin a nih tûr ang a nih theih lohna tûra phuartu, milian phuar behsaka, chhuah zalena, an nihna tûr ang taka an awm theih nâna beihna a ni tih a tilang awm e.

Paula lehkathawn lamah chuan Kristian nun chu soal nena indona nen a tehkhin a. Kristiante chu nun tha leh dik taka sipai anga inthuum a, thim thiltihtheihna do tûr an nih zia a sawi a ni.<sup>7</sup> Thim thiltihtheihna hmachhawn tûra ralthuam lâk tûr a sawite chu thutak, felna, remna Chanchin Tha leh rinna phaw te an ni a. Heng ralthuamte hmang hian misual thal alhthei zâwng zawng a tihmit theih thu kan hmu zui a ni (Eph 6:14-18). Arawngbawlpui - Timothea te (2 Tim 2:3), Epaphrodita te (Phil 2:25) leh Arkippa te (Phlm 2) chu Isua Krista-a a sipai-pui angin a sawi baw k a ni.

Thupuan bu lamah chuan, Thuthlung Hlui lama zawlneiten Lalpa nî chu chhandamna nî anga an sawi thîn ang deuhin (Sam 2; 110:5-7; Ezk 38-39), Lalpa nî lo thlen hun tûr chu hmelma pa Diabola hnehna nî a nih tur thu kan hmu baw k (Thup 16:14; v20:7-10). Chutiang bawkin Qumran Scroll pawhin hun tawpa eng fate leh thim fate indona chungchâng a sawi a. Thupuan bu nen chuan tlemin a sawi dân a hrang hret a. Qumran lehkhabu chuan pâwl pahnih indona angin a sawi a, Thupuan bu lam erawh chuan Pathian thiltihtheihnain hmelmate a hnehzia lam a sawi uar a. Engpawhchu nise, tha leh soal indona, Pathian thiltihtheihnain hnehna a channa hun a nih thu kan hmu a ni.<sup>8</sup>

Heng aţang mai pawh hian Thuthlung Thar lamah hian indona tawngkam hmangin thlarau lam indona hi a sawi nasa hle tih a lang a. Indona chu tha leh soal indona, eng fâte leh thim fâte indona, a tawpa Pathian thiltihtheihna hmanga eng fâten hnehna an chanzia sawilanna a ni zel a ni tih kan hmu.

### Thuthlung Thar zirtîrna leh indona a inrem em?

Tunlaia indo thâwm chi hrang hrang kan hriat lai hian indona chu Thuthlung Thar zirtîrna nen a inrem em? tih hi zawhna pawimawh tak a ni ta. Indona hian chhiatna tam tak a thlen a ni tih chu kan pawm vek awm e. Indonaah chuan a hnehtu zâwk pawhin nasa takin a tuar thîn a. Indonaa thihna avângin chhungkua an insûn a, ram tui lei lovin thenkhat an awm phah bawk. Indona chuan nasa takin mihring khawsakna, ei leh bâr leh rilru a nghawng thîn. Kristian zirtîrna chuan mimal, chhungkua, khawtlang leh ram siam thatna lam a hawi tlat avângin chhiatna nasa tak thlentu indona nen sawi rem theih a ni lo. H. Leo Boles chuan Kristianna leh indona chungchang ti hian a khaikhin a, “Kristianna chu thil a tha zâwna thlentîrtu tûr a nih laiin indona chuan chhiatna a thlen a. Kristianna chuan mi a chawisâng a, indona chuan mi dinhmun a phet a, Kristianna chuan mi a ti thianghlim a, indona chuan nun a tichhia a, Kristianna chu malsâwmna a nih laiin indona chu anchhia a ni fo. Kristianna chuan nun hlimna a pe a, indona chuan lungngaihna a thlen, Kristianna chuan a chhandam a, indona chuan hrehawmna a thlen. Kristianna chuan nunna a pe a, indona chuan thihna. Kristianna chuan Pathian hnenah mi a hruai a, indona chuan chhiatna,”<sup>9</sup> tiin a lo sawi a ni.

Lal Isuan tlâng chungu thu a sawi khân “tual i that tûr a ni lo” tih dân awm sa aiah “a unau chungu thinur apiang chu a chung thu rel a ni ang,” tiin a zirtîr ta thung a (Matt 5:22). Heta thinurna a tih hi, mi that emaw, phuba lâk emaw duh hial khawpa thinrimna sawina a ni a.<sup>10</sup> Lal Isuan indona, tualthahna, phuba lâkna hial siam thei thinurna chu a khap a nih si chuan Kristiante tân chuan indona chu sawi mawi a remchâng lovang. Indona chu huatna leh phuba lak duhna tel lo chuan kalpui theih a ni lo va. Chuti a nih chuan indona chu sawi mawi theih a ni lo va, indona chu eng pawh nise, Kristianna nen a inmil thei lo tih a lang Chiang hle a ni.

## Indona aiin remna

Lal Isuan ṭawngkam pahnih “remna” leh “indona” thu hmanṅ kawpin “khawvela rem lentîr tûra lo kal emaw mi ti elo? Hnai lo ve, ka hrilh a che u, do lentîr tûra lo kal zâwk ka ni,” (Luka 12:51) tiin a sawi a. Matthaia chuan, “Khawvelah hian rem lentîr tûra lo kal emaw mi ti suh u; rem lentîr tûra lo kal ka ni lo va, khandaih lentîr tûra lo kal ka ni zâwk,” (Matt 10:34) tih kan hmu thung. “Do lentir, tih leh “khandaih lentir,” tih kan hmuh avâng hian Isuan râlhtham hmanga indona chu a pawm tihna a ni lo. Luka 12:51-a “do lentir” tih hi chhungkua leh khawtlanga Isua Krista rinna avânga inṭhenna emaw inlunguallohna a kâwk a.<sup>11</sup> “Khandaih lentir,” tih hi entîrna atâna hman a ni a. Isua Krista avânga buaina leh inremlohna awm tûr sawina a ni.<sup>12</sup> Isuan, “Khawvelah hian rem lentir tûra lokal emaw mi ti suh u,” a tiha, “rem lentir tura lo kal” tih hian remna leh muanna chu an rin loh taka pe tawp tûr a nih lohzia sawina a ni a. Isua Krista Chanchin Ṭha avânga Pathian ram dina, remna tluantling chu din tûr a nihzia min hrilh kan ti thei ang. Remna tluantling din tûrin Isua Krista nun, thihna leh thawhleha chu a inngahna a ni a. Tawrhna hmanga remna Chanchin Ṭha chu bul ṭan a nih avângin, Pathian ram leh indona leh tharum thawhna chu Isuan remna siam a tum dân a ni lo tih a lang thei baw.

Indona awm lova remna leh muanna khawvela din chu Pathian thil tum pawimawh tak a ni a. Akohhranhote hi remna a awm theih nâna thawk chhuak tûrin min beisei a. “Remna siamtute chu an eng a thâwl e, Pathian faa vuahin an la awm dawn si a,” (Matt 5:9) a ti hial a ni. Thuthlung Tharah chuan he laiah chauh hian “remna siamtute” (*ειρηνοποι*) tih hi kan hmu a. Ralhtham hmanga indona lian tham tak leh chutiang thil kaihnhawiha remna siam nge thil lian tham ni lem lo buaina kâra remna siam a kawh, engmah sawi lan a awm loh avângin thil lian tham leh lian tham vak lo pawh a huap vek tûra ngaih a ni.<sup>13</sup> Keimahni awmna hmun ang zelin remna leh muanna siamtu ni tûrin min cho a. Indona aia muanna thlentû nih hi Kristiante tih tûr pawimawh tak a nihzia a lang baw.

### **Indona aiin inhmangaihtawna**

Indona chuan hmelmate chhut chauh leh awp beh a tum rân thîn a. An duhna leh tumna chuan Pathian siam nun hlu tak pawh a zah zo tawh thîn lo. Mosia zirtîrnaah chuan “I vengte hmangaih la, i hmelmate haw rawh,” (Matt 5:43) tih kan hmu a. Lal Isua zirtîrnaah erawh chuan, “in hmelmate chu hmangaih ula, a tiduhdahtu che u erawh chu tawngtaisak rawh u,” (Matt 5:43) tih a ni thung. Hmelmate tih hian mimal hmelma sawina chauh a ni lo va, pâwlho emaw ram emaw hmelma sawina pawh a ni thei.<sup>14</sup> Hmelmate hmangaih tûr tih hian mahni emaw midang emaw thil tha lo laka venghim thei lo khawpa inphahhniamna a ni lo va. Min tina-in min hliam thei tih hrereng chungga, anmahni huatna nei lo va, an nun tha lo chu an sima, nun tha zâwk an neih theihna tûra manpui a kâwk a ni.<sup>15</sup>

Thenawmte chauh hmangaih tûra thupek chuan thenawmte piah lam thleng pawha hmangaihna a huam ta zâwk a ni (Lev 19:33-34). Isuan hmemate hmangaih ula a tih zûl chiaha thupek thar a sawi chu “Inhmangaih ula; keiin ka hmangaih ang che u hian nangni pawh inhmangaih ula. In inhmangaih chuan mi zawng zawngin ka zirtîrte in ni tih chu miah chuan an hria ang,” a ti a ni (Joh 13:34-35). Hmelmate hmangaih tûra zirtîrna nen ngaihtuah dun hian he thu hian Kristiante inhmangaih del delna chauh kâwk lovin, mihringte inhmangaih tawn tûra zirtîrna a ni kan ti thei ang. Nunna hi Pathian min pek, a hnen ata kan dawn a ni a. Ngaihluah zah tûrin min zirtîr tel bawh a ni. Ralthuam hlauhawm pui pui nena indona hmanga midangte hneha, hnuaichhiaha, chhiatna tam tak thlen aiin Lal Isuan mihringte chhandamnaa a nun a hlân anga midangte tâna kan nunna hlân ve tûrin min fuih zâwk a ni (1 Joh 3:16).

### **Indona leh hun hnuhnung**

Thuthlung Tharah hian indona hi hun hnuhnung chanchin nen sawi kawp a ni fo thîn. Lal Isua lo kal leh hunah chuan Lal, indonaa thiltitheh tak, khandaih hriam tawn hriam tak nen a hmelmate hneh tûra lo kal tûr angin târlan a ni a (Thup 1:16). Hun hnuhnunga thil

thleng tûr zingah hnam hrang hrang an indo tûr thu leh ram hrang leh ram hrang an indo tûr thu kan hmu bawk (Matt 24:7). Lal Isuan indona leh tharum thawnate awm lohna Pathian ram he khawvela din hi a ngaih pawimawh tak ni mah se, indona chu hun hnuhnûng thlenga awm tûr a nihzia a lang a. Indo thuthang kan hriat hian Lal Isua a lo la kal leh lohzia te leh a lo kal tûrzia te min hriattîr a. A thupek ang ngeia remna Chanchin Tha tlangaupui zl tûrin min fuih bawk a ni.

Indona chungchângah hian Thuthlung Thar hian thlarau lam indona lam a uar avângin indona kaihhnawiha Kristiante inhman dân tûr thuah engmah sawi chian a nei lo. Isua Krista zirtîrna-ah Kaisara thuneihna a pawm a (Matt 22:21), sipai za hotu kha sipai a nih avângin a zilh hek lo va (Matt 8:5ff), Kornelia pawh mi fel tak, Pathian tîh mi (Tirh 10:21) tîh a ni a. Paulan ram roreltute chu Pathian ruat a nih thu a târlan bawk avângin (Rom 13:1-7), Kristiante chu Sawrkar kaihhruaina hnuia indonaah chuan tel thianga ngaihna an nei a. Chutihlaiin, thenkhat chuan, Lal Isuan hriamhrei hman a khap (Joh 18:11) avâng leh khenbeh tûra a chung a hleilenna chu tuar a thlan avângin Kristiante chu indonaa tel ve lo tûra tan chhanah an hmang thung. He ngaihdân hian Pathian ram khua leh tui nihna leh khawvel sawrkâr khua leh tui nihna inlaichînna chungchang thu a ni a. Pathian ramah chuan tharum thawnate leh indona chu hnâwl a ni a, khawvel sawrkâr thilah chuan tharum thawnate leh indona pawh hman tul hun a awm thei bawk.<sup>16</sup> Eng pawh nise, Pathian thuin a tum ber chu he khawvelah hian remna, muanna leh dikna lo pâw vul se tih hi a ni a. Mi pawisawi lote nun chhanhima an awma, remna leh muanna a awm theihna tûra indona leh sipai leh ralthuam tha chakna hman ngaih hun a awm thei ang. A pawimawh ber chu indona leh tharum thawnate awm lo va, remna, muanna leh dikna tungding tûra Pathian kohhranhote kan theih tâwpa kan chet chhuah hi a ni.



## Endnotes

- <sup>1</sup> Peter Wallensteen and Margareta Sollenberg, “Armed Conflict and Regional Conflict Complexes, 1989-97,” *Journal of Peace Research* 35.5 (1998): 621-634.
- <sup>2</sup> The UN Refugee Agency, “Refugee Data Finder,” n.p. [cited July 10, 2023]. Online: <https://www.unhcr.org/refugee-statistics/>.
- <sup>3</sup> Matt 24:6 (2); Mark 13:7(2); Luke 21:9; 1 Cor 14:8, 31; Heb 11:34; Jak 4:1; Rev 9:7, 9; 11:7; 12:17; 13:7; 16:14; 19:19; 20:8
- <sup>4</sup> Rev 2:16; 12:7 (2); 13:4; 17:14; 19:11.
- <sup>5</sup> 2 Kor 7:5; 2 Tim 2:23; Titus 3:9; Jas 4:1; John 6:52
- <sup>6</sup> Ezra Palmer Gould, *A Critical and Exegetical Commentary on the Gospel According to St. Mark* (New York: C. Scribner’s sons, 1922), 64.
- <sup>7</sup> Rom 6.13; 13.12; 2 Kor 6.7; 10.4; 1 Thess 5.8.
- <sup>8</sup> John L. Mckenzie, “War,” *DB*, 919-921.
- <sup>9</sup> H. Leo Boles, *The New Testament Teaching on War* (Nashville: Gospel Advocate Company, 1923), 10.
- <sup>10</sup> H. Kleinknecht, “@ñãP“ *TDNT* 5:383. Craig S. Keener, *Matthew* (The IVP New Testament Commentary Series 1; Downers Grove: InterVarsity Press, 1997, 5:21 (e-book).
- <sup>11</sup> Robert H. Stein, *Luke* (NAC 24; Nashville: Broadman & Holman, 1992), 365.
- <sup>12</sup> Leon Morris, *The Gospel According to Matthew* (Grand Rapids: Eerdmans, 1992), 266.
- <sup>13</sup> Morris, *The Gospel According to Matthew*, 100.
- <sup>14</sup> Keener, *Matthew*, 5:45.
- <sup>15</sup> Loraine Boettner, *The Christian Attitude Toward War* (3 ed; Phillipsburg: Presbyterian and Reformed Publishing Company, 1985), 22.
- <sup>16</sup> P.C. Craigie, “War,” *ISBE*4:1020.

## SYMPATHY

Lainatna, tuarpuina tihna a ni. Mi dangte dinhmun hriatthiampuina leh tuarpuina sawina a ni. A bik takin mite harsatna leh lungngaihna hriatthiampuina hi a ni. Rilru lama tuarpuina maiah a tawp lo va, thil ða tihsak duhna a keng tel fo thin. Harsatna neite counselling-na hmanraw pawimawh tak a ni a. Mite dinhmuna indintir a, an manganna zu chanpui hi natna tihdamna hmaanraw pawimawh tak a ni.

***KRAWS LIAN  
DONATION PÊK THEIH DAN***

***Gpay No: 6033023350  
(H. Lalrinthanga)***

***Bank Cheque hmangin  
State Bank of India  
Branch: Durtlang Branch  
Account No: 39575430134  
Name: MPC Synod  
IFSC: SBIN0017399***

***&***

***Mizoram Rural Bank  
Branch: Durtlang Branch  
Account No: 97013510847  
Name: Mizoram Kraws Lian  
IFSC: SBIN0RRMIGB***

***Pawisa faia pekna:***

- 1. ATC Office***
- 2. Synod Office***

***ADDRESS***

***Aizawl Theological College  
Durtlang Leitan, Mizoram  
Pin - 796015***



Regn. R.N: 24629/72

# Didakhe

A man : Kum Khatah ₹ 80  
Bu mal : ₹ 20

## LAKNA HMUN:

Manager, Didakhe  
Aizawl Theological College,  
Post Box - 167  
Durtlang Leitan, Aizawl-796001  
Mizoram, India  
Ph. 0389-2361126 (O)  
Mobile: 8729832155

E-mail:  
didakhe@atc.edu.in

Website:  
www.atc.edu.in

*A man pe duh, Manager hnêna pe  
remchâng lo tân Pi Lalremsângi,  
Receptionist, Synod Office, Aizawl  
hnênah pêk theih a ni e.*

Printed at Synod Press, Mission Vêng,  
Aizawl - 796001  
Copies - 5,500

To

---

---

---

---

---

